



Tē 14 kî 2002/7/20

2000 nî 5 góeh 20 chhòng-khan

Chóng-pian-chip
Pian-chip kap Siat-kè
Publisher

Tēⁿ Si-chong
Koa Khá-lê
Ko-hiông Tâi-gí Lô-má-jí Gián-sip-hōe

Tâi-ôan Bó-gí Su-chu ê Su-khó

Tiuⁿ Hók-chû Hōe-tiúⁿ

Kàu-iòk-pō tī kin-nî 3--góeh kí-pān Bó-gí su-chu jīn-chèng khó-chhì. Lóng-chóng ū chhiau-kòe 3,000 lâng thong-kòe, thèh-tiòh chu-keh thang khì hák-hāu chò bó-gí kàu-iòk ê khang-khòe, sui-bóng m̄-sī chèng-sek ê kàu-su. M̄-kú, kàu-taⁿ lóng-chóng chiah kan-ta ū 8 % ê lâng siū-tiòh phèng-chhiáⁿ khì hák-hāu kà bó-gí nā-tiāⁿ. Chhun ê lóng iáu bih tī chhù-nih teh hàiⁿ káu-bó-so!

Tī chia, lán beh chèng-sek hō-iòk KIP(Kàu-iòk-pō), chhiáⁿ kok kōan-chhī chīn-liōng phèng-chhiáⁿ chiah-ê lâng khì hák-hāu kà-chheh. Hō in ū ki-hōe thè lán ê gín-á hók-bū. Siāng-sī mā beh kiàn-gī, chiah-ê lâng ê chu-keh kap bó-gí lēng-lék su-iau koh khak-jīn kap chìn-siu. KIP ū pit-iàu tēng 1-ê pān-hoat, hō tāi-ke ū phiau-chún thang chun-siú. Nā-sī lāu-su ták-nî lóng ū koh chìn-pō, Tâi-ôan bó-gí chiah ê tòe teh chìn-pō. Che chin iàu-kín!

Koh lâi, KIP ài kín-kín khai-sí tī tāi-hák lâi-bīn khui-siat **bó-gí kàu-iòk hák-thêng**. Hō chit-má ê hák-seng thang sóan-siu, tûi in pit-giáp liáu beh khì hák-hāu kà Tâi-ôan bó-gí ū chiàⁿ-bīn ê pang-chān. Mā thang hō pát-kho ê lāu-su lâi sóan-siu, āu-pái thang chò chèng-sek ê Tâi-ôan bó-gí kàu-su.

Siōng-bóe, chiū-sī kóaⁿ-kín siat-lip **Tâi-ôan Gí-bûn Hák-hē á-sī Gí-bûn Kàu-iòk hák-hē**. Siōng-hó 1-nî siat-lip 2 keng. Nā-sī án-ne, lán ê bó-gí kàu-iòk chiah ê-tàng bián-kióng sìng chèng-siōng. Lán teh beh tñg-khùi ê Tâi-ôan Bó-gí chiah ū ki-hōe khoaⁿ-khoaⁿ-á koh óah--khí--lâi.